

*Cos na dive, o fumele, d' vostri spos,  
 Ch' ai pias na bagatela 'l vin nebieul?  
 Contenteve d' avei n' eterna cros;  
 Fareve, com' as dis, fin d' pi ch' un peul  
 Per rendie al litragi un poch ritros;  
 Ma 'l natural dij cioch, mie care; a veul  
 Che perfin a l' infern abio bsogn d' beive  
 Contra tuti i decret dij nostri preive.*

### FAVOLA III.

#### 'L Vignolant e 'l Serpent.

**A**ntorn a so ciabot sul cheur dl' invern  
 A j' era un vignolant ch' un di spasgiava,  
 Un om ch' a l' era indegn d' andè a l' infern.  
 E siccom su la fioca as ritrovava  
 Un serpent dal gran freid transi, gelà,  
 Che gnanch mes ora d' vita pi a contava;  
 D' un cheur compassionos fin trop dotà,  
 Cherdendse d' operè con d' brava gent,  
 Tranquil senza pensè lo porta a cà.  
 Dova, sota 'l fornèl subitament  
 Tut antourn al braseri dla famia  
 Destend per deje vita a coust serpent.  
 Ma apena sent 'l caud sta smens maria,  
 Con l' anima ai surtis l' antich velen.  
 S' aventa al vignolant drissandse ardia.  
 A l' è stassi la paga a fè del ben?  
 (Esclama 'l vignolant tut sbaruà)  
 Aspeta ch' it dareu tut lo ch' a t' ven.  
 Dit lo, ciapa un faussèt per là atacà,  
 E tirandie tre colp lo fà 'n tre toch:  
 Così ariva a j' ingratt desnaturà.

*A J'è gnun a coust mond pi gram soget,  
 Che coul ch'as mostra ingrati a un benefissi.  
 Premiolo con la piola o con 'l fausset  
 Saria fè nen d'pi ch'un gran servissi.*

## FAVOLA IV.

### 'L Vei e l'Aso.

Un aso scandalos d'j'orie bin grosse  
 Portava un pover vecc a Moncalè,  
 Quasi vsin a l'età ch'as porto 'l crosse.  
 E vsin a un prà passand ancor da siè,  
 A l'è calà giù abas per lassè l'aso  
 Senza costo d'speisa un poch mangè.  
 Siccome 'l bone taule a tuti piaso,  
 A s'è virassie antorn a sta pastura,  
 Mostrand 'l gran piassi con d'segn ch'i taso.  
 As raviotava ant l'erba senza msura,  
 Fasia dj crie magnifich, strepitos,  
 Quand ecco 'l so padron tut pien d'paura,  
 Vedend a vni n'esercit vitorios,  
 Ai dis: me car borich, su prest scapoma,  
 Saria per noi st'ariv pericolos!....  
 Ma l'aso, da ignorant com'i savoma,  
 Rispond: perchè dovrà scapemne via?  
 Am butralo doi bast se si i restoma?  
 'L vei ai dis ch'd'no. Con faccia ardia  
 L'aso anlora a soggiuns: cosa m'n'a falo,  
 Se sempre la mia sort a l'è paria?  
 A stè con voi, o l'autr, bsogna 'l camalo  
 Ch'i fassa, e piè d'barà per ricompensa.  
 Me car, l'aso a servi l'an condanalo!